



Na osnovu člana 17. stav 2. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sudija Halil Lagumdžija, predsjednik Vijeća, sutkinja Aleksandra Obradović i sutkinja Sanela Gorušanović - Butigan, potpredsjednice Vijeća, tužiteljica Bojana Jolović, sudija mr. Srđan Forca, sudija Mustafa Šabić, advokat dr. sc. Davor Martinović, advokatica mr. Duška Bogoević, prof. dr. Džamna Vranić, tužiteljica Snježana Petković, tužilac Saša Sarajlić i tužiteljica Željka Fabić, na sjednici održanoj 15. i 16.01.2025. godine, donijelo je

RJEŠENJE

o imenovanju tužioca u Federalno tužilaštvo Federacije Bosne i Hercegovine

- I. Za tužioca Federalnog tužilaštva Federacije Bosne i Hercegovine imenuje se **Medina Džerahović**.
- II. Datum stupanja na dužnost imenovane Vijeće će odrediti posebnom odlukom.

Obrazloženje

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 04.11.2024. godine objavilo javni konkurs pod brojem: 04-07-3-3969-1/2024, kojim je oglašeno 9 (devet) pozicija tužioca u Federalno tužilaštvo Federacije Bosne i Hercegovine, sa iskustvom u radu na predmetima organizovanog kriminala i korupcije odnosno složenim krivičnim predmetima.

Nakon provedene konkursne procedure, nadležno podvijeće je u skladu sa članom 59b. st. (1), (3) i (4) Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Prije razmatranja rang liste kandidata, Vijeće je uzelo u obzir činjenicu da su kandidati na rang listi pod rednim br. 1 i 2, nakon finalnog rangiranja kandidata, odustali od kandidature za navedenu tužilačku poziciju, dok su kandidati na rang listi pod rednim br. 7, 9 i 16, po istom konkursu sa druge rang liste predloženi za poziciju sudije Vrhovnog suda Federacije BiH - poseban odjel, a koje imenovanje je uslijedilo nakon izbora i imenovanja kandidata za poziciju tužioca Federalnog tužilaštva FBiH. Kandidat na rang listi pod rednim brojem 14, prije izbora i imenovanja kandidata za poziciju tužioca Federalnog tužilaštva FBiH, imenovan je na poziciju posebnog zamjenika glavnog federalnog tužioca Federalnog tužilaštva Federacije BiH.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da od devet oglašених pozicija tužioca Federalnog tužilaštva Federacije BiH imenuje sedam kandidata, i to kandidate na rang listi pod rednim brojem 3, 5, 6, 12, 13, 17 i 20, Aidu Bešlija, Amru Mehmedić, Samira Selimovića, Ninu Šahinpašić, Aida Hadžismailovića, Jovu Karića i Medinu Džerahović, dok je za dvije pozicije tužioca odlučeno da se konkurs ponovi iz razloga predviđenih članom 62c. stav (1) tačka a) Poslovnika VSTV-a BiH.

Dakle, Vijeće je odlučilo da za sedmu od devet oglašanih pozicija tužioca Federalnog tužilaštva Federacije BiH imenuje kandidatkinju na rang listi pod rednim brojem 20 Medinu Džerahović, iz reda bošnjačkog naroda, koja od 01.12.2017. godine obavlja dužnost tužioca u Kantonalnom tužilaštvu Kantona Sarajevo, u odjelu za privredni kriminalitet i korupciju.

Prethodno imenovanju na poziciju tužioca Kantonalnog tužilaštva Kantona Sarajevo, imenovana kandidatkinja je u periodu od 2008. g. do 2017. g. obavljala poslove pravnog savjetnika u Sudu Bosne i Hercegovine, a u periodu od 2006. g. do 2008. g. u istom sudu obavila je pripravnčki staž.

Vijeće je nakon ocjene stručne sposobnosti kandidatkinje zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju tužioca, uzimajući u obzir, između ostalog, dosadašnje radno iskustvo kandidatkinje, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovana kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 96 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 18 bodova od mogućih 20 bodova, što ju je u konačnici rangiralo na dvadesetom mjestu rang liste kandidata sa ukupno ostvarenih 114 bodova od mogućih 120 bodova.

Kriteriji stručnosti i sposobnosti pravne analize imenovane kandidatkinje, koja već obavlja dužnost tužioca, utvrđeni su na osnovu ocjene rada za posljednje tri godine za koje je ocijenjena, i to za 2021. g., 2022. g. i 2023. g., a računajući do dana isteka roka za podnošenje prijave po navedenom konkursu.

Na osnovu ocjena rada za 2021. g., 2022. g. i 2023. g., odnosno ocjena 4, 5 i 5, utvrđeno je da je kandidatkinja za navedene tri godine za koje je ocijenjena ostvarila prosjek od 4,7. Prema odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 4,7 dodijeljen je ekvivalentan broj bodova koji se koristi u konkursnoj proceduri od 96 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 18 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja u skladu sa čl. 59a. stav (1) tačka c) i 59b. st. (3) i (4) Poslovnika VSTV-a BiH stekla uslove za predlaganje i imenovanje na poziciju tužioca entitetskog tužilaštva, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom tužilaštvu, u smislu člana 43. stav (2) Zakona o VSTV-u BiH.

Vijeće je prilikom imenovanja navedene kandidatkinje ocijenilo da ne postoje okolnosti koje izazivaju sumnju u pogledu podobnosti kandidatkinje za poziciju za koju se prijavila.

Adekvatna nacionalna zastupljenost u konkretnom tužilaštvu utvrđena je na osnovu popisa stanovništva iz 1991. godine.

Nacionalna struktura 23 tužioca, prema popisu stanovništva iz 1991. godine, bi trebala biti: Bošnjaci (12,0), Hrvati (5,1), Srbi (4,0), Ostali (1,9). Trenutna nacionalna struktura 13 tužilaca: Bošnjaci (7), Hrvati (2), Srbi (3), Ostali (1).

Prema prethodno navedenoj nacionalnoj strukturi u Federalnom tužilaštvu Federacije BiH nedostaje kandidata iz reda bošnjačkog naroda (- 5,0), hrvatskog naroda (- 3,1), srpskog naroda (- 1,0) i ostalih (- 0,9).

Dakle, uzimajući u obzir trenutnu nacionalnu strukturu u navedenom tužilaštvu, Vijeće je za sedmu od devet oglašanih pozicija tužioca imenovalo dvadesetorangiranu kandidatkinju, koja dolazi iz reda bošnjačkog naroda.

Imajući u vidu potrebu za popunjavanjem pozicija u zakonom formiranom posebnom odjelu Federalnog tužilaštva Federacije BiH za rad na predmetima organizovanog kriminala i korupcije, koja je utvrđena u skladu sa članom 34. stav (1) tačka h), a u vezi člana 59b. stav (5) tačka e) Poslovnika VSTV-a BiH, Vijeće je prilikom imenovanja vodilo računa i o radnom iskustvu i rezultatima imenovane kandidatkinje na predmetima organizovanog kriminala i korupcije, te složenim krivičnim predmetima.

Radi utvrđivanja navedenih okolnosti, radnog iskustva i rezultata kandidata na predmetima organizovanog kriminala i korupcije, te složenim krivičnim predmetima, za kandidate su pribavljena mišljenja u skladu sa članom 59c. Poslovnika VSTV-a BiH. Navedene okolnosti su dodatno utvrđene na osnovu informacija pribavljenih na razgovoru sa kandidatom, u skladu sa članom 53. stav (11) Poslovnika VSTV-a BiH, te uvidom u službene evidencije Vijeća.

U mišljenju glavne tužiteljice Kantonalnog tužilaštva Kantona Sarajevo navodi se, da je tužiteljica Medina Džerahović nezavisna i stručna, ispoljava želju za proaktivnim istragama, kao i želju za složenim i značajnim predmetima, te posjeduje dovoljno radnog iskustva na Odjelu za privredni kriminalitet i korupciju. Rezultate njenog rada najbolje pokazuju podaci o predmetima u kojima je donosila tužilačke odluke i na koncu koji su do sada rezultirali sa pet osuđujućih presuda. Radi se o iskusnoj tužiteljici koja je sposobna efikasno i kvalitetno provoditi istragu u složenim predmetima i njena saradnja sa agencijama za sprovođenje zakona je na zavidnom nivou.

Glavni tužilac Federalnog tužilaštva FBiH je nakon pribavljenog stava kolegija tog tužilaštva u svom mišljenju, između ostalog naveo, da je tužiteljica Medina Džerahović u svom referatu imala značajan broj kompleksnih predmeta iz oblasti privrednog kriminala i korupcije koji bi, po sadašnjem zakonskom rješenju, potpadali pod stvarnu nadležnost Posebnog odjela Federalnog tužilaštva FBiH za suzbijanje korupcije i organiziranog kriminala. Imala je u radu visokopozicionirane djelatnike koji su bili medijski eksponirane službene osobe. U odnosu na podignute i pregledane optužnice prilikom kontrole nisu uočeni suštinski nedostaci koji bi se odnosili na pravilnost činjeničnih opisa u odnosu na datu pravnu kvalifikaciju. Na osnovu pregledanih predmeta, mišljenje je da tužiteljica posjeduje značajna praktična iskustva, rezultate i stručnost u složenim predmetima iz oblasti korupcije i privrednog kriminala na kojima je radila samostalno ili kao članica tužiteljskog tima.

Na osnovu navedenih mišljenja, informacija pribavljenih na razgovoru, te uvidom u službene evidencije Vijeća, zaključuje se da imenovana kandidatkinja ima potrebna stručna znanja, iskustvo i rezultate na predmetima organizovanog kriminala i korupcije, te složenim krivičnim predmetima.

Shodno odredbama člana 62. stav (2) Poslovnika VSTV-a BiH, Vijeće je u odnosu na kandidate sa rang liste pod rednim br. 4, 8, 10, 11, 15, 18 i 19 dalo prednost kandidatkinji na rang listi pod rednim brojem 20 Medini Džerahović iz slijedećih razloga:

Vijeće je prije svega cijenilo da su kandidati sa rang liste pod rednim br. 4, 8, 10, 11, 15, 18 i 19, kao i imenovana kandidatkinja u toku konkursne procedure po kriterijumima koji se primjenjuju prilikom ocjene uspjeha postignutog u konkursnoj proceduri, kako u pogledu kriterijuma koji se ocjenjuju na osnovu ocjene rada kandidata u prethodnom relevantnom periodu ili na osnovu kvalifikacionog i pismenog

testiranja, tako i u pogledu kriterijuma koji se ocjenjuju na razgovoru sa kandidatima, ostvarili potreban uspjeh za imenovanje na poziciju tužioca entitetskog tužilaštva. Dakle, svi navedeni kandidati su u skladu sa odredbama člana 59a. stav (1) tačka c) i člana 59b. stav (3) i (4) Poslovnika VSTV-a BiH, a u vezi sa članom 61. istog poslovnika stekli uslove za predlaganje i imenovanje na poziciju tužioca Federalnog tužilaštva Federacije BiH.

Prilikom ocjene uspjeha kandidata sa rang liste pod rednim br. 4, 8, 10, 11, 15, 18, 19 i 20, postignutog u konkursnoj proceduri, primjenjeni su kriterijumi iz člana 43. stav (1) Zakona o VSTV-u BiH, uključujući 1) stručnost kandidata, 2) sposobnost pravne analize, 3) komunikativnost i sposobnosti prezentacije, 4) sposobnost kandidata da odgovorno, nezavisno i nepristrasno obavljaju funkciju tužioca, uzimajući u obzir, između ostalog, 5) dosadašnje radno iskustvo kandidata 6) profesionalnu nepristrasnost i ugled, 7) ponašanje van posla, 8) edukacija i usavršavanje, 9) objavljivanje stručnih i naučnih radova, te druge aktivnosti u struci, koji su na osnovu strukturiranog i objektivnog postupka ocjenjivanja, jasno izraženi kroz ocjene.

Polazeći od činjenice da je imenovana kandidatkinja ostvarila manji broj bodova od kandidata na rang listi pod rednim br. 4, 8, 10, 11 i 18, Vijeće je ocijenilo da je takav položaj kandidata na rang listi posljedica male razlike u ukupno ostvarenim bodovima, koja u konkretnom slučaju ne ukazuje na stvarnu razliku u kvaliteti u korist kandidata pod rednim br. 4, 8, 10, 11 i 18 sa rang liste.

Obzirom da Vijeće u skladu sa članom 43. stav (2) Zakona o VSTV-u BiH, prilikom predlaganja i imenovanja kandidata vodi računa o nacionalnoj i spolnoj zastupljenosti u pravosudnim institucijama u kojima se vrši imenovanje, te imajući u vidu činjenicu da u ovom momentu u Federalnom tužilaštvu Federacije BiH nedostaje značajan broj kandidata iz reda bošnjačkog naroda (- 5,0), Vijeće je u odnosu na kandidate sa rang liste pod rednim br. 4, 8, 11 i 18, koji dolaze iz reda srpskog naroda i kandidatkinju na rang listi pod rednim brojem 10, koja dolazi iz reda ostalih, iz navedenih razloga odstupilo od rang liste i opredjelilo se za imenovanu kandidatkinju sa rang liste pod rednim brojem 20 koja dolazi iz reda bošnjačkog naroda.

Dakle, Vijeće je u konkretnom slučaju cijeno ispunjenost kriterija, u smislu člana 43. stav (1) Zakona o VSTV-u BiH, ali i posebne uslove iz stava (2) koji se odnose na jednaku zastupljenost konstitutivnih naroda, te rodnu ravnopravnost, pa je iz navedenih razloga dalo prednost imenovanoj kandidatkinji.

U odnosu na kandidatkinje na rang listi pod rednim brojem 15 i 19, koje dolaze iz reda bošnjačkog naroda, kao i imenovanja kandidatkinja, Vijeće je dalo prednost imenovanoj kandidatkinji, uzimajući u obzir činjenicu da je ista na razgovoru sa članovima Komisije, na kojem se razmatralo i vrednovalo sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti, ostavila dojam da se radi o kandidatkinji od koje se, u konkretnom slučaju u većoj mjeri može očekivati da će uspješno, stručno i savjesno obavljati dužnost tužioca u Federalnom tužilaštvu Federacije BiH.

U prilog ovoj činjenici govori podatak, da je imenovana kandidatkinja u odnosu na kandidatkinje na rang listi pod rednim br. 15 i 19, na razgovoru pred nadležnom komisijom Vijeća ostvarila najveći broj bodova.

Neposredan kontakt sa imenovanom kandidatkinjom pred nadležnom komisijom Vijeća za obavljanje razgovora, pokazao je na strani imenovane kandidatkinje prednost u odnosu na navedene kandidatkinje, a što je u konačnici prihvatilo i Vijeće kao cjelina.

Vijeće je cijeno da imenovana kandidatkinja, za razliku od kandidatkinja pod rednim br. 15 i 19 sa rang liste, posjeduje značajno radno iskustvo i rezultate na predmetima organiziranog kriminala i korupcije, uključujući i predmete visoke korupcije.

Na takav zaključak upućuje činjenica da je imenovana kandidatkinja u svom referatu imala značajan broj kompleksnih predmeta iz oblasti privrednog kriminala i korupcije koji bi, po sadašnjem zakonskom rješenju, potpadali pod stvarnu nadležnost Posebnog odjela Federalnog tužilaštva FBiH za suzbijanje korupcije i organiziranog kriminala. U periodu od posljednjih pet godina imala je ukupno 5 pravosnažnih osuđujućih presuda po optužnicama u predmetima organiziranog kriminala i korupcije. Kandidatkinje na rang listi pod rednim br. 15 i 19, koje trenutno obavljaju dužnost tužioca Kantonalnog tužilaštva Kantona Sarajevo u odjelu za opšti kriminalitet imaju iskustvo, rezultate i stručnost u radu na složenim predmetima opšteg kriminala. Kandidatkinja na rang listi pod rednim brojem 15 ima iskustvo u radu na predmetima organizovanog kriminala koji su uglavnom bili povezani sa predmetima za organizovane grupe prometa opojnim drogama, nije postupala u predmetima korupcije visokog nivoa. Kandidatkinja na rang listi pod rednim brojem 19 nije postupala, niti je imala presuda u predmetima organiziranog kriminala i korupcije.

Uzimajući u obzir sve navedeno, Vijeće je kumulativno vodeći računa o svim okolnostima iz člana 59b. stav (5) tač. a), b), c) i e) i stav (7) Poslovnika VSTV-a BiH, ocijenilo da je imenovana kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bila imenovana na poziciju tužioca u Federalno tužilaštvo Federacije BiH.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju novoimenovanog tužioca, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na dužnost, a provjera njihovih izvještaja o imovini i interesima bit će izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-424-1/2025
Datum: 16.01.2025. godine



